

S'pura bakal anjur Akademi Timbang tara Antarabangsa

HISHAM HASIM

SINGAPURA bakal menganjurkan Akademi Timbang tara Antarabangsa Singapura mulai 26 November hingga 14 Disember ini.

Ia selaras dengan usaha negara mahu terus membangunkan sektor timbang tara dan mengamalkan sekitaran yang protimbang tara, dan bergerak sejajar dengan keperluan industri tersebut.

Demikian diumumkan Menteri Undang-Undang, Encik K. Shanmugam, di pembukaan sesi pleno Kongres ke-21 Majlis Antarabangsa bagi Timbang tara Komersial yang diadakan di Pusat Pameran dan Konvensyen Marina Bay Sands, pagi semalam.

Menurut Encik Shanmugam, akademi tersebut akan dianjurkan bersama oleh fakulti undang-undang Universiti Nasional Singapura (NUS) dan Pusat Perundangan Antarabangsa (CIL) NUS.

Ia bakal menjadi program latihan terunggul Asia dan diisasarkan kepada para pengamal swasta, pihak kaunsel dan pegawai pemerintah yang mengendalikan tengkarah antarabangsa dan ingin meningkatkan ke-

mahiran dan pengetahuan dalam bidang timbang tara.

Program selama 16 hari itu akan diadakan di Kampus Bukit Timah NUS, dan ia akan menggabungkan teori, latihan kemahiran dan kuliah mengenai amalan dan undang-undang timbang tara yang penting.

Akademi itu hanya akan menerima 60 peserta pada tahun pertamanya, demi memastikan latihan dan penyertaan yang berkesan.

Encik Shanmugam turut melahirkan keyakinan bahawa akademi tersebut akan menyumbang kepada pembangunan kepakaran dalam timbang tara antarabangsa, di rantau kepakaran sedemikian terus berkembang.

Memberikan perincian terkini mengenai Pusat Timbang tara Antarabangsa Singapura (SIAC), Encik Shanmugam dalam ucapannya turut mendedahkan bahawa ia telah mengendalikan 188 kes baru tahun lalu.

Daripada jumlah tersebut, 135 merupakan kes antarabangsa yang dikendalikan sepenuhnya menurut aturan SIAC.

Ini berbanding dengan Pusat Tim-

bang tara Antarabangsa Hongkong yang mengendalikan 41 kes baru tahun lalu termasuk kes-kes domestik.

Menurut Encik Shanmugam, dalam tempoh lima bulan pertama tahun ini saja, SIAC mengendalikan 118 kes baru – naik seganda berbanding tempoh yang sama tahun lalu iaitu 59 kes.

Nilai keseluruhan bagi kes-kes tersebut adalah lebih \$2 bilion – melebihi nilai kendalian SIAC bagi seluruh tahun lalu iaitu \$1.3 bilion.

Kejayaan Singapura, kata Encik Shanmugam, adalah hasil strateginya yang fokus dan sistematik.

Dasar dan perundangan di sini, katanya, dibangunkan secara perbincangan dengan pihak industri dan berupaya diubah dengan segera sekiranya perlu.

Memandang ke hadapan, pemerintah bertekad memainkan perannya bagi menghadapi cabaran mendatang.

Matlamatnya, kata Encik Shanmugam, adalah menjadikan Singapura sebuah pusat khidmat perundangan dan timbang tara yang unggul di dalam dan luar rantau ini.